

求闕齊弟子記

求闕齋弟子記卷六

東湖王定安譔

平寇三

咸豐八年正月皖賊犯蘄州界唐訓方擊卻之 多隆阿敗賊於仙田鋪追至太湖城 二十九日蕭啟江劉坤一克新淦縣時僞翼王石達開竄踞江西之鉛山河口鎮率衆二萬窺伺浙境將軍福興退守廣信府 二月初四日石達開陷廣豐縣總兵饒廷選攻克之賊退踞洋口 皖賊陷英山縣遂大舉犯羅田署知縣崔蘭馨會主事姚敦禮敗賊於樂利河乘勝收復英山縣 十五日張運蘭王開化克樂安縣 唐訓方敗賊於

黃泥阪守備梁宏勝擒僞丞相韋朝綱 富森保唐訓方貽賊  
於南陽河 時公在籍修小祥禮弟國華降期服闋 是月和  
春遣軍克秣陵關 三月公弟國華出贊李續賓軍事於九江  
初四日張運蘭王開化收復宜黃縣 初六日張運蘭等收  
復南豐縣 蕭啟江劉坤一克崇仁縣 鄂賊竄商城李孟羣  
遣軍敗之於金家寨賊由了角山一日夜行百里陷麻城官文  
道舒保回軍追擊之 是月張國樑率師圍金陵敗賊於七甕  
橋雨花台印子山等處遂與李若 戴文英圍其二門 石達  
開由廣豐竄浙江連陷江山常山開化等縣胡林翼疏請飭李  
元度率平江勇赴浙江扼要駐守 四月初七日李續賓楊載

福彭玉麟會克九江府僞貞天侯林啟榮伏誅初林啟榮竊據九江分黨據湖口石鍾山彭澤等處層棚密壘犄角相依公始建攻九江之議楚軍相持數載賊西竄湖北南入江西腹地我軍迄未撤圍大東門外有磨盤洲者高岡危峙虬蟠虹帶李續賓令軍士於其下潛開地道築牆爲蔽外張旗幟木梯僞陳攻城具以疑賊三月末地道轟坍東門十餘丈南門再坍我軍蟻附登城賊以火器抵禦死亡相繼卒不能入李續賓令軍士再穴地道迤東而南楊載福彭玉麟率水師攻北門臨江一帶是日寅刻地雷驟發磚石飛騰震撼山岳立塌東南城垣一百餘丈兵勇痛兩次傷亡之慘人盡思奮踴躍齊登掩殺兩時之久

斃賊一萬六七千人尸骸填衢偽貞天侯林啟榮及偽元戎李興隆死亂軍中寸磔之捷聞浙江布政使李續賓福建提督楊載福廣東惠潮嘉道彭玉麟均奉

旨給獎有差 公弟國荃攻吉安屢敗賊於白鷺洲天華山遂旁克吉水萬安二縣 李續賓克麻城縣 二十日蕭啟江劉坤一克撫州府 二十四日張運蘭王開化克建昌府賊竄入浙江境 二十六日皖賊陷黃安縣 是月欽差大臣和春提督張國樑攻賊於雨花台大破之 德興阿遣軍敗賊於石橋 閩浙總督王懿德遣軍克政和縣 五月初二日李續賓克黃安縣 初四日李續賓收復麻城縣追賊至商城 皖賊犯

蘄州唐訓方擊卻之 李元度敗賊於玉山子午口 是月和  
春遣軍克江浦來安兩縣又遣軍攻金川門盡燬東北城外賊  
壘 李定泰克壽昌縣 時石達開陷處州府圍攻衢州甚急  
全浙震動朱鳳標許乃普沈兆霖等連疏請

飭催李續賓赴浙藩任辦理軍務胡林翼以皖事方棘楚邊未  
靖李續賓所部攻堅太久方募新軍更補疏留續賓在楚皖之  
交當陳玉成一股

上旣命提督周天受援浙慮資淺未能統衆乃令和春督辦浙  
事已聞和春患病乃起復公自湘鄉赴江西統率舊部以謀浙  
江

諭曰會國藩開缺回籍計將服闋現在江西撫建均經克復止餘吉安一府有會國荃劉騰鶴等兵勇足敷剿辦前諭耆齡飭令蕭啟江張運蘭王開化等馳援浙江該員等皆係會國藩舊部所帶兵勇得會國藩調遣可期得力會國藩著馳驛前往浙江辦理軍務並著駱秉章傳旨令該侍郎迅速赴江西督率蕭啟江等星馳赴浙江與周天受等力圖掃蕩該侍郎前此墨經從戎不辭勞瘁朕所深悉現當浙省軍務喫緊之時諒能仰體朕意毋負委任何日起程並著迅速奏聞以慰廑念 六月公治裝由湘鄉至長沙奏報起程日期

硃批汝此次奉命卽行足徵關心大局忠勇可尙抵營後迅將

如何布置進剿機宜由驛馳奏可也 初五日李元度克常山縣 初六日李元度克江山縣 初八日浙軍周天受克武義縣 和春遣軍會周天受克永康縣 初九日周天受克縉雲縣 初十日周天培克宣平縣 十六日周天受克處州府 七月公由武昌歷九江湖口以達南昌援浙諸軍俱集於河口 鎮公由南昌趨河口 時浙江所失各城次第克復僞翼王石達開率黨竄福建連陷松溪崇安建陽等縣建甯府城被圍浙江巡撫晏端書以衢處解嚴檄總兵饒廷選副將張騰蛟馳援 閩省又遣軍由江山擊楊輔清於浦城副將陶茂森游擊韓廷桂統之並轉檄周天受派軍赴浦城會剿



上諭前因浙江軍務緊急諭令會國藩赴浙剿辦現在衢州解嚴處州等州縣相繼克復浙境餘匪不難剋日肅清惟閩省浦城崇安建陽松溪政和等處賊勢蔓延亟應趕緊剿辦和春等現飭周天培於援浙兵勇內挑選精銳三千數百名由龍泉一帶進剿饒廷選帶漳州兵勇亦馳往浦城會國藩業已奏報起程卽以援浙之師由江山鉛山直搗崇安相機進剿迅將閩省各匪一律掃除毋少延悞 福建知府陳維漢克松溪縣 知縣楊國榮克政和縣 知縣劉潤田克甯化縣 初七日浙軍收復龍泉縣 十五日僞國宗楊輔清圍廣豐玉山城李元度擊卻之 二十二日周天培克浦城縣 胡林翼丁母憂解任

回籍

詔官文兼署湖北巡撫。是月和春張國樑攻金陵築長圍鑿山越水周城百餘里燬城外賊壘殆盡。八月初八日公抵河口鎮時張運蘭蕭啟江吳國佐朱品隆各軍陸續到鎮因疏稱竄閩之賊以石達開爲最悍其誑煽莠民張大聲勢亦以石逆爲最譎謹遵

諭旨卽日親督兵勇由鉛山入分水關直搗崇安由崇安而東北可出小關仙霞嶺仍趨廣豐玉山一路以達於皖境由崇安而南約有三路東路出建陽葉坊以至延平府西路出光澤龍湖以至建甯縣中路出麻河挈口而至將樂則可達於汀州而

遁入廣東現在署督臣慶端駐紮延平東路當可無虞西路各境在在與江西毗連現經撫臣耆齡調派候補道劉長佑一軍由撫州移防新城瀘溪嚴扼杉關等隘口或無回竄江西之慮其由北歸皖省併入賊黨南回廣東仍返老巢均在意中俟抵崇安探確賊踪再行續奏 十三日閩賊陷安仁縣公遣張運蘭往擊之 十五日公弟國荃克吉安府初僞先鋒李雅鳳僞丞相翟明海同踞吉安城國荃所部吉字營圍守經年斬馘甚衆自瑞臨撫建先後克復賊死守孤城已成坐困初四日國荃率諸軍水陸環攻毀賊船於白鷺洲初十日賊以木簾順流衝營禦之於棧潭灣等處小划小簾擊奪淨盡並擊散大簾一座

斃賊無數賊旣屢敗李雅鳳翟明海互相疑忌明海爲雅鳳所殺其黨夜出城乘舟遁去國荃率水師追擊令軍士薄城而登生擒李雅鳳及僞副將軍吳大法等於是江西全省肅清奉

旨曾國荃以知府遇缺卽選賞加道銜 公移駐弋陽 十九

日張運蘭克仁安縣僞經畧楊在田率二千餘人竄樂平 閩

賊回竄新城縣 時撫建新克人心未固而吉安竄出餘匪連

陷崇仁宜黃兩縣公檄張運蘭兼程援新城公亦由雙港改道

南趨建昌 劉長佑敗賊於新城賊退入閩境 二十一日多

隆阿克潛山縣遂克石牌鎮 是月周天受克建陽縣 閩軍

克邵武府 九月初九日公抵建昌府遣張運蘭一軍由杉關

進剿順昌將樂之賊蕭啟江由廣昌進剿汀州甯化之賊吳國  
佐赴南豐廣昌石城一帶扼要駐紮時賊勢併注汀州復有千  
刀會匪盤踞石城之迴龍砦公建議先清江西再規汀州甯化  
因疏稱江閩交界中隔大嶺北自仙霞南至武平一嶺綿亘殆  
逾千里大關小隘處處可通現派張運蘭由北度嶺蕭啟江由  
南度嶺中間泰甯南豐等處尙覺空虛該逆仍可伺隙回竄而  
二年以來賊迹往返蹂躪嶺內如建昌各屬嶺外如邵汀各屬  
井邑蕭條百物蕩盡今歲疾疫流行居民鮮少閩中田荒米貴  
油鹽無從購買且無現錢可換臣駐紮建昌一面防中路回竄  
之賊一面轉運錢米等件解赴蕭啟江張運蘭兩處臣距蕭啟

江四百餘里距張運蘭三百餘里而蕭張相距亦在五百里外  
擬俟順昌將樂賊匪剿盡歸併汀州一路臣亦率隊繼進庶無  
此剿彼竄之虞 十六日公弟國荃率師至建昌李續賓遣弟  
續燾克桐城縣進攻舒城又克之賊遁入三河偽城續賓率師  
圍之 都興阿率馬隊攻安慶破大橋頭賊壘多隆阿鮑超會  
攻集賢關賊棄壘而遁適楊載福水師至北門克賊壘四座安  
慶踞賊氣奪閉城不敢出 是月賊酋陳玉成由浦口陷揚州  
德興阿退駐邵伯鎮張國樑渡江攻克之 賊陷六合縣補用  
道溫紹原死之紹原江夏人權知六合縣事募鄉勇爲守禦計  
大江南北重城皆望風瓦解六合以彈丸獨存大小百戰屢殲

賊衆歷六年之久賊始以全力破之紹原聞變攜妻王氏子溫輔材長媳陳氏投水以殉從事者多不屈死 十月初十日李續賓偕公弟國華戰歿於三河鎮先是八月間李續賓督兵入皖一月之內連克太湖潛山桐城舒城軍鋒甚銳當者披靡遂進圍三河鎮以規廬州三河鎮者賊屯聚米糧軍火以爲接濟廬州金陵之地也有僞城一附以磚壘九續賓周察形勢以攻城必先破壘令丁銳義等攻河南大街及老鼠夾黃勝日等攻東北之迎水庵水晶庵一帶李續薰攻西面儲家越而親督金國琛劉運會毛有銘劉人和等策應各路初二日黎明出隊九壘皆克守賊殲盡其時城賊與白石山之賊分途來救復爲馬

隊擊退是日斬馘七千級城賊恒懼飛書乞援於是僞英王陳玉成率大股自江浦六合廬江西上僞侍王李世賢捻酋張洛行自廬郡率大股號十餘萬連夜竄至金牛鎮白石山一帶連營數十里包抄大軍後路初九日援賊逼近勢頗猖獗是夜續賓派金國琛毛有銘楊得武彭友勝丁銳義張嵩齡張養吾劉人和各出六成隊往金牛擊剿行十五里黎明至樊家渡王家祠堂突遇大股來撲金國琛毛有銘劉人和馬步分進賊以數枝包抄數枝搗戰我軍連環轟擊賊大奔追逼賊壘殺賊約二千忽大霧迷漫咫尺莫辨賊由左路抄出數大股直前衝突我軍左路先潰中右兩路均爲賊襲返戈衝殺而前後皆賊彭友



勝胡廷槐饒萬福死之員弁勇丁傷亡過半隊伍星散歸路已爲賊阻截矣續賓自領親兵縱橫盪決殺傷甚夥僞城之賊復分股衝出合之援賊綿亘二三十里鄒玉堂杜廷光趙國幹又死之弁勇傷亡愈衆續賓傳令軍中嚴守牆壘是時賊已逼近七營牆壘皆破續賓戰至二更殺賊已近二千李續燕彭祥瑞率勇越壘而出於是賊踞其壘斷河隄以絕我軍去路續賓勇氣百倍怒馬當先往來奮擊斃賊又數百人戰至三更續賓身而俱受矛傷自度事不可爲躍馬入賊陣死之公弟國華與同知何裕何忠駿知縣王揆一縣丞李續藝訓導吳立蓉萬斛泉等皆與難道員孫守性與諸將堅守營壘三日而敗死之又六日桐城守兵

亦敗前後死者殆六千人無苟活者 續賓字希庵湘鄉人少  
從羅澤南學爲人含宏淵默稠人廣坐終日不發一言愛人不  
尙美言而意溢於色色餘於辭湘軍之興威震海內創之者澤  
南大之者續賓也其選士以知恥近勇樸誠敢戰爲尙遇賊則  
以人當其脆而已當其堅糧仗則予人以善者而已取其竄者  
其駐營處所百姓歡忭耕種不輟萬幕無譁秋毫不犯他軍之  
將士逃難之流民皆歸之如父兄自咸豐二年從羅澤南倡團  
練七年之中轉戰湖南湖北江西安徽諸省大小六百餘戰克  
復四十餘城而恂恂退讓口不言功世尤多之當諸將失利之  
時或勸突圍而出續賓不可捧

廷旨

殊批奏摺焚之曰不可使

宸翰落賊手及其歿遠近痛哭舒桐難民負骸骨以出事聞  
上震悼

手詔曰覽奏不覺隕涕惜我良將不克令終尙冀其忠靈不昧  
他年生申甫以佐予也

追贈總督子諡忠武湖北安徽江西湖南皆建祠 國華與續  
賓爲婚姻時湘軍屢捷人人自以爲無前國華獨以爲常勝之  
家難可深恃時時與續賓深語悚切以警其下且以書告公肝  
上至是與續賓同殉

上憫之加恩照道員議卹予諡愍烈先是胡林翼丁憂回籍  
詔起復署理湖北巡撫林翼聞李續賓歿乃赴黃州視師 十  
一日公弟國荃回湘 時福建之汀州甯化順昌將樂各城次  
第收復惟連城尙有餘匪其大股分三股竄江西一爲僞國宗  
石某一爲僞先鋒何某僞檢點傅某一爲僞都督羅某僞檢點  
盧某先竄瑞金會昌雩都等縣繼乃竄入信豐南安界中窺伺  
贛州並攻陷景德鎮公檄蕭啟江進攻信豐南安之賊檄張運  
蘭赴景德鎮會劉于浚助剿以保饒州門戶 是月和春遣軍  
克溧水縣 十一月湖廣總督官文湖南巡撫駱秉章連疏請  
公移師援皖

上諭皖北賊勢鴟張楚省邊防喫緊此時閩省之賊南趨漳泉距江西漸遠若照駱秉章所請令該侍郎移師赴皖而留蕭啟江所部四千餘人防守江西亦未始非權衡緩急之計惟曾國藩所部各軍多染疾疫前奏尙須休息且景德鎮尙有大股逆匪隨剿隨進亦非計日可到著曾國藩豫爲籌度如果閩省兵勇足資剿辦而江西邊境防剿有人自以赴援皖省尤爲緊要不獨廬州省城可收南北夾攻之效卽上竄湖北之路亦可藉資堵扼倘因汀州等路尙須兵力一時不能移軍或須俟景德鎮股匪殲除再回楚北亦著斟酌具奏 公覆疏云伏查近日賊勢以皖南北爲最重皖南約分兩路中隔大山如彭澤之浩

山祁門之歷山績溪之鄣山以及黃山九華皆此一山之所綿亘自山以北如貴池銅陵下至蕪湖當塗濱江各屬自咸豐三年以來久爲粵匪出沒之區自山以南現惟婺源景德鎮兩處有賊兩處之賊不除則饒廣徽衢四府時時可危若能驅兩處之賊逐出山外歸併江邊則江浙防務皆鬆而皖南亦有一條鞭之勢皖北約分兩路中隔一湖周圍四百餘里名曰焦湖自湖以南如安慶無爲巢縣和含久爲粵匪盤踞之所自湖以北如廬州鳳陽以及淮北各屬則粵匪與捻匪錯雜紛擾汗漫不可收拾前此都興阿由石牌進攻安慶勢趨湖南李續賓由舒桐進剿廬州勢趨湖北自十月初旬三河桐城相繼挫敗安慶

撤圍士氣大傷逆氛日熾皖北賊勢浩大倍於皖南十二月初將軍都興阿總兵鮑超屢獲勝仗官文分派各軍防布要隘胡林翼聞警起復馳赴李續宜軍重加整頓楚皖之交人心漸定而皖南自灣沚黃池之變戴文英鄧紹良先後殉難亦恐悉力上竄合景德之股匪擾及湖口窺伺九江以臣愚見論大局之輕重則宜併力江北以圖清中原論目前之緩急則宜先攻景德鎮以保全湖口臣擬正月初旬移駐都陽彭湖等處與都興阿等軍不過一江之隔百里之遙如果北岸有警亦可就近策應 十二月閩浙總督王懿德奏請飭公暫緩移師留張運蘭一軍保衛閩境

上諭會國藩援閩之師前因所部兵勇多染疾疫暫駐建昌調度徐圖拔隊繼進嗣值李續賓全軍失利皖北賊勢披猖經官文駱秉章奏請飭令該侍郎移師援皖留蕭啟江所帶四千餘人防守江西當經諭令會國藩倘因汀州等處尙須兵力江西景德鎮大股匪徒尙未盡殲未能卽日由楚入皖令其斟酌情形具奏茲據王懿德奏接會國藩咨稱擬率卽選道張運蘭等軍赴楚剿辦該督以閩省賊熾兵單連城尙被占踞接壤之饒州甯都等府州紛紛告警專賴會國藩大軍鎮定邊陲其前部張運蘭一軍已抵邵武轄境正資協剿未可撤回所奏亦係實情着會國藩通籌大局如閩省賊匪猶賴援軍卽將張運蘭一



軍暫留攻剿與王懿德會商辦理至湖北防堵現已周備惟皖南北粵捻磨集有須兵力而江西地方尙有大股賊匪該侍郎亦難舍近而圖遠仍著斟酌調度可也 公復疏云臣才識短淺何足以規畫全局就近處數省而論則安徽軍務最爲喫重江西次之福建又次之皖南中界一山皖北中隔一湖兩路賊勢臣前疏已詳悉具奏近聞福建之賊尙踞連城江西之賊竄入南安贛州戒嚴定南崇義相繼失守以臣愚見連城之賊聞省兵力應足了之南贛之賊人數尙多悍者較少非一校客軍所能猝辦必須本省兵力輔以團練方可徐起有功惟安徽賊黨其氛甚惡其患方長大凡官軍與賊此消則彼長彼消則此

長斷無中立之理我能進而剿賊則賊將竭力禦我不暇他竄我不能進而剿賊則賊將乘隙犯我旁出四溢皖南無進剿之師則賊必東犯浙江皖北無進剿之師則賊必北犯齊豫故就一隅觀之則江西之南贛福建之連城均是賊黨均須兵力不可舍近而圖遠就全局觀之則兩利相形當取其重兩害相形當取其輕又不得不舍小而圖大舍其枝葉而圖其本根誠使大江兩岸各置重兵水陸三路鼓行東下剿皖南則可分金陵之賊勢卽可紓浙江之隱憂剿皖北則可分廬州之賊勢卽可紓山東河南之隱憂方今湖北全省肅清然與皖境處處緊接防不勝防者莫如湖北據上游之勢能制皖賊之死命者亦莫

如湖北臣與官文胡林翼熟商就現在之兵力稍加恢廓北岸  
須添足馬步三萬人都興阿李續宜鮑超等任之中流現有水  
師萬餘人楊載福彭玉麟任之南岸須添足馬步二萬人臣率  
蕭啟江張運蘭等任之三道並進夾江而下幸而得手進占十  
里則賊威十里之勢進占百里則賊少百里之糧卽不甚得手  
而上游之勢旣重卽下游之賊不得不以全力禦我其於金陵  
廬州兩大營均足以抽釜底之薪而增車外之輔此遵

旨通籌全局宜併力大江兩岸之微意也至臣處近日軍情蕭  
啟江一軍自石城拔營南赴粵都據稟南贛各屬賊踪蔓延力  
難兼顧臣批令專救贛州以保要郡不必旁顧他處張運蘭一

軍自臘月十七日馳抵景德鎮十九日吳國佐小挫一次二十七日張運蘭大勝一次開仗情形山臣另摺具奏贛州居江西之極南景德鎮居江西之極北相距千有餘里臣駐建昌距兩軍各五六百里調度不靈轉運不便且兩處皆孤軍深入賊衆兵單日夜焦思無師可濟臣前次摺尾聲明蕭啟江之軍或留防南路或隨臣北行容俟續行具奏近日詳加體察顧此則失彼顧南則失北與其懸心兩地不若專力一方已咨商江西撫臣耆齡請其另調勁軍以剿南贛兼辦團練以散脅從臣卽專辦北路調回蕭啟江一軍歸併饒州彭湖等處在江西則臣管北邊耆齡管南邊在皖楚則臣攻南岸都興阿等攻北岸地有

分防斯責無旁貸師有定向斯士無二心免致到處牽掣一無所成此臣處近日軍情擬調蕭啟江並赴北路之微意也臣往歲在軍未聞賊能用馬隊近聞賊匪常以馬隊衝鋒捻匪則馬匹尤多李續賓三河之敗卽係賊馬數千爲湘軍向來所未見昨吳國佐景德鎮之挫亦爲賊馬所眩今欲整頓陸軍不得不添設馬隊東三省馬隊天下勁旅根本所在不敢多爲調奏臣與湖北督臣撫臣緘商擬由官文等奏調察哈爾馬三千匹請旨飭上駟院押解來南潁毫一帶有善騎之勇可募名曰馬勇應卽添練新馬隊二千餘騎與都興阿之舊隊相輔而行於九江湖口等處擇平原曠野馳驅而操習之惟以南人而騎北馬

以勇丁而學弓箭非倉卒所能奏效臣願竭數月之力朝夕講求從容訓練期於成熟而止練成之後以二千匹交江北隸都興阿舒保等麾下以五百匹交江南隸臣麾下以壯步軍之氣而寒賊黨之膽餘剩馬匹游牧於黃州鞍轡等具設局於九江以備隨時添補之用仰仗

皇上威福茲事若成皖豫等省可期大有起色此添置馬隊臣願任教練之微意也溯自咸豐六年洪楊內亂河北肅清武漢再克臣方幸以爲大難計日可平不謂遷延歲月粵匪未靖搶匪復滋餉項有日竭不支之勢將士有久疲思退之心若非奮發精神變換局面將有類乎古人所謂惰氣歸氣者不得不改

可國元亨二言  
名二  
絃更張亟思所以振之疏入

上覽之

咸豐九年正月初十日閩軍克連城縣 十八日蕭啟江攻南  
康新城墟賊壘克之時賊踞南安者有五支一爲僞翼府宰制  
陳亨容傅忠信何名標一爲僞渠帥蕭壽鏌蔡次賢一爲僞尙  
書周竹岐一爲僞軍略賴裕新黃裕發一爲僞承宣劉逸才張  
遂謀衆至七八萬將由南康犯贛州於新城墟築僞城設望樓  
百餘座占踞村莊二十餘里蕭啟江率軍士銜枚疾走伏於赤  
石塘先令民團誘賊賊大至伏兵驟起賊倉皇奔潰遂克新城  
墟斃賊二千餘名 二十四日蕭啟江連克池江小溪鳳皇城

長江墟賊四二十五日克崇義縣 二十八日張運蘭攻景德  
鎮敗績 是月和春遣鄭魁士克灣沚朱承先克黃池 二月  
初三日蕭啟江攻克南安府 初四日公行大祥禮 初十日  
蕭啟江援信豐大捷賊解圍遁 十六日公移駐撫州 二十  
四日張運蘭敗賊於景德鎮 是月張國樑擊賊於浦口大破  
之擒僞固天福洪方僞立天豫莫興 張芾遣軍克婺源縣  
是月賊陷廬州大營署安徽巡撫李孟羣死之孟羣河南進士  
湖北按察使李卿穀子也以廣西知縣從軍轉戰湖南北安徽  
諸省所向有功自湖北率兵援皖皖中赤地千里兵餉絀孟  
羣經營苦戰軍民皆憐之廬州旣陷奉



旨穢職留營自効時駐軍官亭長城一帶以堵廬州西面賊由六安來撲十五日副將鄧清知縣李孟荃兩營相繼失陷孟荃大營被賊擁入猶持矛屹立圍牆厲聲罵賊手刃悍賊三名力竭而亡事聞奉

旨優卹 三月十三日張運蘭敗賊於景德鎮 朱品隆凌蔭廷募湘勇三千五百人至撫州 僞翼王石達開竄湖南達開自出金陵至安慶久與洪秀全隔絕有衆十餘萬冀據險自雄乃由江西南安取道崇義竄入桂陽總兵劉培元彭定泰防軍敗績賊連陷桂陽興甯宜章等縣擾及新田嘉禾時湖南兵餉皆竭於遠征腹地空虛巡撫駱秉章以軍事委幕僚左宗棠經

營徵繕一月內成軍四萬人宗棠晝夜草檄告州郡授以節度而官文胡林翼復檄吉林黑龍江馬隊赴湘助剿遣蕭翰慶率水師三十二號回長沙復令趙福元陳金鰲舒保等爲後援湘防賴以鞏固 石達開圍永州劉長佑率師擊走之斃賊六七千人生擒五百餘名賊竄至祁陽之觀音灘 時楚軍入皖者多隆阿鮑超逼近太湖計九千餘人唐訓方蔣凝學率七千人駐太湖之荊橋當安慶石牌之衝阿達春歐陽正埔率二千五百人留防陳德園余際昌率二千人駐英山其分駐楚之羅田麻城者千五百人耳 是月張國樑破賊於九洑洲 四月石達開犯寶慶府湘鄉戒嚴公弟國潢治團練於鄉里公嚴禁各

勇告假回籍委員任衡州偵賊勢三日一報隨時函告各營以  
慰之 二十七日公弟國荃至撫州營 二十八日張運蘭敗  
賊於景德鎮 五月初九日公與弟國荃設次行釋服禮旋派  
國荃統湘軍五千八百人赴景德鎮助剿時湖南寶慶之賊圖  
竄四川湖廣總督官文奏請

飭公帶兵入蜀

上諭官文所奏各情實爲通籌大局起見本日已諭令有鳳派  
兵扼要嚴防惟該省兵力恐不能當此悍賊會國藩前派蕭啟  
江帶兵援剿湖南現在湖南喫重此一軍自未能調回此外如  
江西湖北等兵素稱得力著會國藩卽日統帶由楚江前赴夔

州扼守以據兩湖上游之勢倘賊蹤竄至卽可有備無患至江西景德鎮之賊尙未剿平著會國藩斟酌情形咨商耆齡妥爲布置俾得迅掃逆氛不至顧此失彼公覆疏云自本年賊擾湖南永郴被圍湘勇在江西者各懷內顧之憂近日寶慶危急距湘鄉不過百里弁勇瞻顧身家歸思尤切徒以景鎮喫緊不准告假一旦拔隊征蜀道經楚境必且紛紛請假凡勇之弊敗挫則不知歸伍久征則常思還家不獨湘勇爲然各省均坐此弊今攜湘勇直上夔州水路三千餘里風濤之惡三峽之險程途太遠人地太生竊恐弁勇未必樂從卽使多方開導樂於西征而粵賊現在湖南號稱二三十萬若更竄蜀裏脅更多臣以區

區萬人入蜀剿固不敷防亦不足孤軍客寄傷亡難補以勢度之恐無補於大局若遵

諭旨據兩湖之上游則卽現在之兵力畧加水師駐紮宜昌等處卽可穩占上游固湖廣之西門若必徑趨夔州則不以兼顧湖廣爲重而以籌防全蜀爲重不特蕭啟江一軍必須調集同行且當添集水陸婆齊三萬人乃可攜以入峽自軍興以來以陝西省最爲完善而蜀中財力雄厚百物豐饒木多足以立舟師馬多足以備騎隊尤爲逆黨所涎羨我

皇上瞻焉西顧防患未形洵屬刻不可緩之至計惟景德鎮目下難遽抽動及臣處兵力單弱情形不得不縷陳於

聖王之前 六月十四日公弟國荃會張運蘭克景德鎮遂克  
浮梁縣國荃至景德鎮三戰皆捷賊糧垂盡適天雨江漲水師  
直逼西瓜洲賊以火簾火船衝擊劉于渢力禦卻之是夜水陸  
各軍施放噴筒火箭延燒鎮市民房賊衆忙亂乘黑暗潛竄浮  
梁縣國荃率蕭孚泗等由中路進張運蘭率劉松山等由左路  
王文瑞率凌蔭廷等由右路斬馘迫奔十五日辰刻抵浮梁縣  
城內忽出悍賊三四千人迴過浮橋直衝中路國荃率衆奮擊  
立斃悍賊二百餘名賊落水者千人當卽跟追入城運蘭從西  
門抄入賊奔竄郟門建德一帶江西肅清捷聞奉

旨會國荃以道員用張運蘭等進秩有差 石達開賴文光大

舉攻寶慶胡林翼遣李續宜赴援合劉長佑劉嶽昭田興恕等  
擊破之 是月皖賊陷定遠縣前淮陽道郭沛霖知縣周佩濂  
死之 七月初一日公弟國荃率師至撫州 初十日公至南  
昌公弟貞幹原名國葆從軍於黃州胡林翼留贊軍事 十九日公  
至湖口 公前奉防蜀之

命建議駐紮宜昌並檄張運蘭一軍回援寶慶以期殲賊於楚  
朝旨謂公所籌但爲鎮守湖北起見尙未籌防蜀省仍催令率  
師入川旋又奉暫留兵勇赴徽會剿及酌撥兵勇留防江西之  
命公覆疏云伏查江西雖全省肅清而防務未可稍弛南則防  
湖南廣東之賊北則防皖南徽池之賊前此各軍之在北路者

饒州有劉于信彭澤有普承堯一軍臣昨經過省城撫臣耆齡與臣熟商擬留饒廷選在江添領一軍又令吳坤修出省另領一軍皆防守北路九饒各屬普承堯一軍自建德敗挫士氣未復只能謹守彭澤不能進圖皖境其劉于信饒廷選吳坤修三軍擬以二軍分防北邊以一軍助攻皖南稍濟徽州兵力之所不逮至南路吉贛等屬如係粵中小股來犯本省兵力足以禦之如係寶慶大股回竄仍須奏調蕭啟江一軍攔頭迎剿與湖南反擊之師共收夾攻之效至臣隨身所帶各營人數無多不特不能抽撥赴皖並不能酌留防江此臣處兵單不能分剿皖境之情形也 是月和春遣李若珠敗賊於六合張玉良敗賊



於天長 江西信豐之賊竄廣東總督黃宗漢遣軍討平之粵  
東肅清 八月十一日公至黃州適官文以寶慶解圍敗賊悉  
數南竄疏請

飭公緩赴川省暫駐湖口進剿皖省

詔許之 二十三日公至武昌 胡林翼檄公弟貞幹回湘募  
勇 多隆阿鮑超攻克石牌偽城 九月公回駐黃州之巴河  
漕督袁甲三奏兩淮糜爛請

飭公軍由河南光固進剿遏賊北竄

上諭袁甲三等所慮不爲無見著官文會國藩胡林翼再行悉  
心籌酌此次官文等會籌大舉關係全局利害總須計出萬全

不妨稍遲時日也 公覆疏云臣行次武昌晤商督臣官文維時探聞湘賊大股全竄粵西前隊已趨義甯距黔省邊界甚近或由龍勝懷遠一帶入黔以遂其竄蜀之謀亦未可定惟以道里計之賊蹤離蜀尙隔三千餘里粵黔兩省萬山叢雜賊多食少勢難遽達蜀境查皖北粵捻各匪蔓延日廣南爲金陵蕪湖之援北爲齊豫數省之患自安慶至宿亳千餘里人民失業田廬蕩然勝保翁同書兩軍相隔甚遠兵餉並絀東北各路亦無協剿之師誠如

聖諭非由楚省派兵馳援不能牽掣賊勢官文胡林翼擬將援湘馬步各軍調回分路進發皖鄂接壤途徑紛歧上年李續賓

銳意深入連克四城有戰兵而無守兵是以中道挫衄今懲前此之失須合力圖之中原腹地莫重於皖生民苦厄莫甚於皖就大局緩急而論臣自應回軍援皖先其所急詳考入皖形勢進兵須分四路南則循江而下一由宿松石牌以規安慶一由太湖潛山以取桐城北則循山而進一由英山霍山以取舒城一由商城六安以規廬州南軍駐石牌則可與楊載福黃石磯之師聯爲一氣北軍至六安則可與翁同書壽州之師聯爲一氣臣所部不及萬人僅足自當一路若將援湘之蕭啟江調回則臣處可分爲兩支若並將張運蘭調回則臣處可分爲三支一支之力僅能會剿皖北三支之力則可專任皖南 石達開

犯桂林省城巡撫曹澍鍾會湘軍擊卻之初石達開在寶慶永  
明道州疊次懲創旁皇歧路其黨多籍廣西懲惡歸竄遂由新  
甯城步等處山僻小路犯桂林曹澍鍾登陴固守挑精銳輕師  
出襲屢殲賊衆夜乘大風拋擲火箭噴筒焚賊壘無數適劉長  
佑蕭啟江率湘軍馳援啟江由南門文昌閣分投進剿與前廣  
西布政使蔣益澧水陸兜擊賊衆南竄省城解嚴 二十日石  
達開陷慶遠府 十月公弟國荃率所部吉字營至巴河請假  
回籍公弟貞幹領所招湘勇至鄂 時疊奉

諭旨飭公安籌全局公覆疏云伏維自古辦竊號之賊與辦流  
賊不同剿辦流賊法當預防以待其至堅守以挫其銳剿辦竊

號之賊法當剪除枝葉併搗老巢今之洪秀全據金陵陳玉成據安慶私立正朔僞稱王侯竊號之賊也石達開等之由浙而閩而江而湖南而廣西流賊之象也官張諸捻之賊數衆多分合無定亦流賊之類也自洪楊內亂鎮江克復金陵逆首凶骸久衰徒以陳玉成往來江北勾結捻匪廬州浦口三河等處迭挫我師遂令皖北之糜爛日廣江南之賊糧不絕臣等竊以爲欲廓清諸路必先攻破金陵全局一振而後江南大營之兵可以分剿數省其餉亦可分潤數處欲攻破金陵必先駐重兵於滁和而後可去江甯之外屏斷蕪湖之糧路欲駐兵滁和必先圍安慶以破陳逆之老巢兼搗廬州以攻陳逆之所必救誠能

圍攻兩處畧取旁縣該逆備多力分不特不敢悉力北竄齊豫  
並不敢一意東顧江浦六合蓋竊號之賊未有不竭死以力護  
其本根者也現擬四路進兵自江濱而北第一路由宿松石牌  
以規安慶臣國藩親自任之第二路由太湖潛山以取桐城多  
隆阿鮑超等任之第三路由英山霍山以取舒城臣胡林翼親  
自任之先駐楚皖之交調度諸軍兼籌轉運第四路由商固以  
規廬州調回李續宜一軍任之袁甲三等原奏恐驅賊北竄請  
由光固潁州繞赴北路等語查湘勇久戰江濱於淮北賊情地  
勢不甚熟悉能否繞出懷蒙以北應俟李續宜軍至固始再行  
奏明辦理又附陳現患目疾請假調理

上諭會國藩著賞給一月在營調理該侍郎一路兵勇既待另籌而李續宜亦係獨當一面復因母病給假是四路中已有二路急難進征於皖北待援情形實有緩不濟急之勢至所稱先圍安慶兼搗廬州等語尙屬周妥但恐言之易而行之難所有前諭派出一軍取道光固潁州繞出懷蒙以北之處仍著悉心籌酌辦理 是月勝保遣軍克懷遠縣 周天受敗賊於涇縣賊陷浦口營提督周天培死之 十一月公由黃梅移駐宿松 彭玉麟收復池州府賊酋韋志俊降其黨古隆賢復攻陷之 是月張國樑敗賊於江浦 十二月胡林翼進軍英山公弟貞幹從之 多隆阿飽超攻太湖僞英王陳玉成率悍黨十

餘萬人來援多隆阿等禦之於小池驛力戰卻之

咸豐十年正月十一日金國琛余際昌敗賊於太湖之仙天庵  
遂移進紅長山觀音巖以偏賊十九日敗賊於廣福寨 蕭啟  
江率師由常德入蜀剿辦土匪 二十三日吳坤修普承堯克  
建德縣 二十五日賊陷涇縣 二十六日多隆阿等擊援賊  
於太湖大破之遂會公弟貞幹克太湖縣初賊酋陳玉成乘陰  
霧四塞潛移壘於羅山衝白沙畝一帶冀與城賊勾通牽綴我  
軍二十五日黎明多隆阿率所部馬隊鮑超率霆字五營唐訓  
方率訓字七營蔣凝學率湘字八營朱品隆率湘軍七營會合  
夾擊賊之黃蓋紅旗彌山漫谷多隆阿令其步隊誘賊賊果分



股來撲蔣凝學橫截之唐訓方尾抄之朱品隆扼於右鮑超遏於前多隆阿率馬隊從中路賊遂大敗斬馘三千生擒僞庶天侯麥烏宿僞軍師旅帥巡查汪遂林陳得勝曹正太等二十七八次日多隆阿等分三路進攻鮑超等攻小池驛當東路蔣凝學等攻羅山衝當西路多隆阿自居中路策應時羅山衝之賊蜂擁而出蔣凝學連破衝口賊卡攻入山內朱品隆越山而進兩軍層層殺上多隆阿馬隊繼之山賊抵敵不住屍盈澗谷而鮑超之攻小池驛者亦獲大勝多隆阿蔣凝學鮑超等遂合東西中三路乘勝進攻賊壘值東南風作火箭延燒七八里樹焦山赤燬賊壘一百數十座斃賊七八千人時金國琛等駐軍山

內聞山外大戰分隊沿山兜擊生擒僞指揮傅得高僞丞相葉榮發僞將軍舒春華斬之於是城內之賊宵遁公弟貞幹等以一營繞其營一營追其後殲賊無算遂克其城是役也殺賊約二萬餘爲軍興來不多見之大戰云 賊陷旌德縣 是月張國樑攻克浦口九洑州賊壘 袁甲三克鳳陽府縣二城 石達開竄廣東初達開踞慶遠城分股由富川竄入連山廳廣東軍擊走之餘匪仍回湖南至是復由藍山桂陽輾轉至廣東之樂昌仁化始興等縣皆爲官軍擊敗復擾及南雄之百順司副將哈芬布擊走之 二月初三日賊陷廣德州 二十七日賊陷杭州浙江巡撫羅遵殿等死之初賊由廣德州竄安吉道武

康以趨杭州羅遵殿乞援於公時湘軍勁旅將圍攻安慶而由徽赴浙約程必兩月餘緩不濟急

上命和春兼辦浙江軍務提督張玉良總統援浙諸軍未至而賊已先撲杭城守陣兵士寥寥賊在清波門暗掘地道轟塌城垣三十餘丈遂陷之羅遵殿及布政使王友端鹽運使繆梓杭嘉湖道葉埜杭州府知府馬昂霄仁和縣知縣李福謙皆殉難在籍侍郎戴熙城陷後從容盡節 是月張國樑克金陵之上下關平賊壘數十座 三月記名按察使李續宜假滿來皖公與會議以公所部攻國安慶多隆阿攻國桐城李續宜駐軍青草塢以爲援 是月初三日張玉良克復杭州杭州城內有滿

城將軍瑞昌勒兵堅守廐戰六晝夜玉良至遣人入滿城密約滿營夾攻玉良聞城內礮聲大震知瑞昌已出營剿賊遂督軍親攻艮山門民團肩長梯倚牆立軍士緣梯齊登瑞昌亦自滿城出隊開武林門納師賊亡命巷戰殲斃以數千計復追剿於獅虎橋城隍山餘賊倉皇出竄初四日復追殺於萬松嶺橫山等處賊竄臨安孝豐長興等縣官軍復連克之 張芾克績溪縣 閏三月公弟國荃自湘來營率師攻安慶駐紮集賢關是爲規取安慶之始 十三日蕭翰慶克太平縣 江長貴克旌德縣 十五日蕭翰慶克石埭縣 是月賊陷江南大營遂犯丹陽幫辦軍務提督張國樑死之初和春攻金陵增築長圍意

謂克復金陵在指顧間兵士驕甚迨浙江告警援師遠出存營兵力漸薄值軍饟不繼擬四十五日發一月之糧兵勇私布傳單心漸攜貳城賊糾合死黨先踞句容縣自初七日起紛撲大營張國樑晝夜拒戰而賊來益衆十四日大雷雨酷寒夜間各營火起軍士潰散十五日春與張國樑退守丹陽賊連陷溧陽宜興進圍丹陽令黠賊潛入大營中伺張國樑出戰自後狙擊之創甚猶血戰刃數賊躍馬入丹陽河以死張國樑初名嘉祥廣東高要縣人在粵頗不逞後率所部於南甯鎮投誠頗有疑之者廣西巡撫勞崇光知其忠勇保護甚至繼隨向榮轉戰數省所向無敵由偏裨擢升提督幫辦江南軍務東南半壁倚

如長城及其死丹陽遂陷和春突圍而出賊衆進逼常州和春聚潰兵迎敵胸前受槍傷衝圍退至潁墅闢火毒內陷嘔血而死兩江總督何桂清棄常州奔蘇州巡撫徐有壬不納乃奔至常熟復奔上海蘇浙戒嚴

上諭江浙安危在於呼吸會國藩現紮安慶若與楊載福率領所部水陸各軍迅由東流建德一帶分剿蕪湖並入甯境以分賊勢而顧蘇常於東南大局實有神益惟安慶賊勢頗重會國藩能否舍安慶而東下著酌量情形相機辦理有人奏左宗棠熟悉形勢運籌決計所向克敵現在賊勢披猖東南蹂躪請酌量任用等語應否令左宗棠仍在湖南本籍襄辦團練等事抑

或調赴該侍郎軍營俾得盡其所長以收得人之效並著酌量辦理 四月初六日賊陷常州府 十三日賊陷蘇州省巡撫徐有壬等死之蘇州守兵不滿四千脆弱不習戰徐有壬令張玉良守高橋三戰皆捷賊分股間道繞出九龍山襲陷無錫玉良師潰率敗卒走杭州賊趨蘇州號數十萬城中大亂遂陷之有壬遇害妾施氏子郎中徐震翼弟徐曾庾募友鮑鄂等皆從死同時殉難者署按察使朱鈞蘇州府教授張鏡淳而已事聞兩江總督何桂清署布政使蔡映斗等均奉

旨逮問

詔假公兵部尚書銜署理兩江總督以薛煥署江蘇巡撫並

論軍情緊急務當兼程前進收復失陷地方於是公悉以圍攻  
安慶之師命弟國荃任之因疏稱蘇常未失卽宜提兵赴援冀  
保完善之區蘇常旣失則須通籌各路全局擇下手之要著求  
立脚之根本自古平江南之賊必踞上游之勢建瓴而下乃能  
成功自咸豐三年金陵被陷向榮和春等皆督兵由東面進攻  
原欲屏蔽蘇浙因時制宜而屢進屢挫迄不能克金陵而轉失  
蘇常非兵力之尙單實形勢之未得也今東南決裂賊饒益張  
欲復蘇常南軍須從浙江而入北軍須從金陵而入欲復金陵  
北岸則須先克安慶和州南岸則須先克池州蕪湖庶得以上  
制下之勢若仍從東路入手內外主客形勢全失必至仍蹈覆



報終無了期臣所部萬餘人已進薄安慶城下深溝固壘挖濬長壕若一撤動則多隆阿攻桐城之軍亦須撤回卽英山霍山防兵均須酌退各路皆退則軍氣餒而賊氣盛不但鄂邊難以自保卽北路袁甲三翁同書各軍亦覺孤立無援是安慶一軍目前關係淮南之全局將來卽爲克復金陵之張本此臣反復籌思安慶城圍不可遽撤之實情也臣奉

恩命權制兩江必須帶兵過江駐紮南岸以固吳會之人心而壯徽甯之聲援無論兵之多寡將之強弱臣職應南渡不敢稍緩現定於十日內拔營渡江駐紮徽州池州兩府境內擬於江之南岸分兵三路一由池州進剿蕪湖與楊載福彭玉麟之水

師就近聯絡一由祁門至旌太進圖溧陽與張芾周天受等軍就近聯絡一分防廣信玉山以至衢州與張玉良王有齡等軍就近聯絡目下安慶之圍不可遽撤臣函商官文胡林翼酌撥萬人先帶起程一面遣弁回湘募勇須七月方能到齊八月方能進剿從前金陵大營以蘇常爲根本餉精軍械源源接濟臣今自皖南進兵應以江西爲根本昨據安慶營中盤獲陳玉成偽文內稱現派楊輔清李世賢李秀成等直取蘇常再攻徽浙以竄江西又擬派吳如孝張洛刑由定遠壽縣六霍以竄湖北等語蘇常已失則該逆所稱各狡計均屬意中之事湖北各軍有官文胡林翼諒可無虞江西兵力單薄實不足以折新勝之

賊略秉章素顧大局賊若窺伺江西兵勇餉械仍當借資湖南臣等竭五六兩月之力辦江楚三省之防仰仗

皇上威福能待兵勇漸齊布置漸定然後與賊力戰所以保固江西兩湖者在此所以規復安徽三吳者亦在此目今賊餒方張人心大震但求立腳之堅定不論逆氛之增長

上嘉納之於是疏薦左宗棠剛明耐苦曉暢兵機請破格錄用胡林翼亦特疏保薦奉

旨左宗棠以四品京堂候補襄辦曾國藩軍務左宗棠以一軍立功天下自此始 十六日賊陷嘉興府張玉良率潰兵駐杭州巡撫王有齡令移軍嘉興以禦賊 楊載福彭玉麟敗賊於

樅陽 劉長佑克慶遠府斬僞國宗石達德賊竄入貴州連陷  
廣順永甯州 是月饒廷選克涇安縣賊竄入徽州境 蕭翰  
慶戰沒於湖州 五月公自宿松進發祁門疏言臣連日與官  
文胡林翼商撥兵勇安慶之圍業已奏明勿撤臣所部萬人暫  
交臣弟曾國荃留皖統帶但於安慶圍師中抽出朱品隆唐義  
訓之二千人從征而飭臣弟另募二千人以補其缺又於鄂師  
中咨調鮑超羣字營六千楊鎮魁禮字營一千合之現駐宿松  
馬步隊約共萬人隨臣先行過江又檄調張運蘭一軍並咨商  
湖南撫臣駱秉章候補四品京堂左宗棠在湖南募勇萬人由  
江西以達皖南惟鮑超因傷回籍須六月可到張運蘭遠在郴

州須七月可到左宗棠續募之勇到皖更須時日臣目下南渡應先駐祁門縣境東以聯張芾徽州之聲援西以保江右饒州之門戶俟鮑超張運蘭到時卽令先赴徽甯蕪湖兩路俟李元度募勇五千到時卽令由廣信赴浙蘇一路計三人到營之期先後不甚相遠臣已於十五日自宿松啟行便道至安慶水師營次與楊載福彭玉麟面商後卽由建德以趨祁門 又奏臣自聞蘇州失守之信卽以京倉無漕爲慮查淮陽之裏下河產米最多而鹽場爲大利所在若改爲就場征課每年可多得銀百萬兩以外如果蘇松久陷不能辦漕或於裏下河辦米解京或於鹽課中籌銀解京亦足以濟權變而固根本然非於淮安

多造戰船急辦水師實有岌岌不可保之勢胡林翼七次寄函  
皆勸臣奏辦水師以保鹽場淮揚二郡自古稱爲澤國北有長  
淮南有大江中有洪澤邵伯高郵寶應諸湖運鹽串場人字芒  
稻諸河巨浸支流互相灌注一片汪洋若能造戰船二三百號  
多購洋礮精選將弁則不特可保裏下河之米場竈之鹽亦且  
可以輔揚州之陸軍使賊不得北犯助臨淮之陸軍使川路不  
至梗塞此淮揚宜辦水師之情形也賊之守金陵也以安慶廬  
州爲犄角以太平蕪湖爲護衛蕪湖之南有固城南潁丹陽石  
臼諸湖上可通於甯國之水陽江清弋江下則止於東壩掘東  
壩而放之則可經太湖歷蘇州以達於婁江古之所謂中江者

也蕪湖孤懸水中賊匪守之則易官軍攻之則難是以五年血戰不能得手而黃池灣沚屢次失利皆以全無水師之咎臣愚以爲欲克金陵必須先取蕪湖欲取蕪湖必於甯國另立水師編布固城南漪等湖之中甯國水師攻其內大江水師攻其外庶幾蕪湖可克而東西梁山可期恢復此甯國宜辦水師之情形也逆匪堅忍善守官軍圍攻屢年往往因水路無兵不能斷其接濟今蘇州旣失面面皆水賊若阻河爲守陸軍幾無進攻之路城外幾無紮營之所臣愚以爲欲攻蘇州須於太湖另立水師浙江無事宜於杭州造船浙江有警亦宜於安吉孝豐等處造船必使太湖盡爲我有而後西可通甯國之氣東可拊蘇

州之背而陸師亦得所依附此太湖宜辦水師之情形也臣自咸豐三年辦理水師閱歷頗久而三處皆臣管轄之地鹽漕皆臣應辦之事義無可辭責無可貸擬俟皖南布置稍定臣或輕騎馳赴淮安監辦水師或奏派大員赴淮辦理屆時再行續陳又保薦彭玉麟任事勇敢勵志清苦有古烈士風堪勝總辦水師之任均奉

旨報可 是月江蘇巡撫薛煥遣軍克嘉定縣太倉州遂克松江府 貴州巡撫劉源瀚克永甯州賊陷歸化廳 湖州在籍道員趙景賢敗賊於平望 劉嶽昭克賀縣 二十八日公次建德



上諭有人奏安慶一城經曾國藩水陸布置賊已援絕勢窮刻  
日可復如舉建瓴之師直搗金陵急攻東壩踞蘇之賊必回顧  
老巢卽以援蘇之師乘勢夾攻則蘇州可復常鎮可圖較之由  
長江取道赴蘇更爲便捷等語如果安慶一城指日可復正不  
妨先復安慶沿江而下乘金陵賊衆空虛之時直搗巢穴一面  
調派援兵併攻蘇州使賊首尾不能相顧均著酌量緩急妥籌  
辦理公覆疏云臣迭次奏報以安慶之圍不可撤動蓋取以上  
游制下游之勢爲進攻蕪湖克復金陵張本淮陽水師要在必  
行爲兼取以北岸制南岸之勢爲保護鹽漕協剿江淮張本至  
安慶一城西南瀕江有楊載勳彭玉麟水師扼紮東北倚山有

臣弟曾國荃陸軍扼紮城外之接濟漸斷城內之賊糧尙足北面雖挖長壕東面尙未合圍逆酋四眼狗母婁宗族皆在城中秋間援賊必至如能與多隆阿李續宜各軍合力擊退則城賊勢窮可期得手卽不能遽拔堅城但使陳逆全股與安慶桐城官軍相持亦足分下游之賊勢紓蘇浙之兵力至南岸進兵之說適接王有齡函開中路不宜遽進溧陽恐其驅賊南犯臣擬俟左宗棠李元度鮑超張運蘭先後到齊北路則趨池州南路則趨廣德中路暫不深入先守徽甯要縣庶免抄我後路之患亦無逼賊南竄之虞此臣注重安慶皖南不敢先圖蘇常之微意也 六月十一日公至祁門縣

上諭曾國藩現已抽兵萬人進駐祁門俟鮑超張運蘭李元度到後卽行分路進兵具見胸有成見謀定後戰惟蘇省待援迫切該署督惟當催令鮑超等迅速來營會籌進剿但能援師早到一日卽早一日救民水火實深殷盼該署督兵勇較軍未可輕率前進宜加持重爲要又

諭徽甯等府本曾國藩兼轄地方該處軍務併由該署督督辦自覺事權歸一蓋皖南督師張芾被人彈劾也 時川省有藍大順李短搭之難

朝廷垂詢左宗棠能否獨當一面飭令督辦川省軍務公與胡林翼合辭上陳云候補四品京堂左宗棠前在湖南贊助軍事

肅清本境克攻鄰省上年石逆大股竄湘幫同撫臣駱秉章指揮調度不數月間遂收廓清之效其才可以獨當一面該員思力精當識量闊達於軍事實屬確有心得前奉

諭旨令左宗棠襄辦軍務該員感激圖報聞

詔之日卽在湘募練五千人選擇甚嚴鉅細必躬專俟秋間成軍率以東下今若改東師以西行則臣國藩頓少一枝勁旅恐不足當皖南之逆氛而左宗棠獨往川省亦恐人地生疎呼應不靈且以吳蜀之事論之蜀省土匪倡亂佔地少而撲滅差易江皖狂寇披猖佔地多而掃蕩甚難蜀爲鄂秦兩省之根本吳爲京師及東南數省之根本蜀有可籌之餉項吳無可靠之協

餉事勢既分難易情形亦有重輕不待智者而可決左宗棠素知大局勇敢任事必不肯舍難而就易避重而就輕合無籲懇聖恩俯念臣國藩襄助需人仍令左宗棠督勇來皖實於江楚等省大有裨益奉

旨報可 二十四日

詔以公補授兩江總督並授爲欽差大臣督辦江南軍務 時賊圍甯國府提督周天受督兵固守僞輔王楊輔清自池州旌德會犯甯國天受上疏乞援

上飭公撥兵會剿 是月賊由於潛疊陷餘杭臨安二縣將犯杭州將軍瑞昌遣總兵劉季三擊卻之 提督張玉良攻嘉興

垂克復失之 七月初四日竄杭之賊田安吉孝豐回撲廣德  
州陷之 僞忠王李秀成陷松江府遂犯上海薛煥擊卻之  
上以薛煥僻處海隅兵力單弱蘇常無重兵攻剿都與阿尙在  
英山江北各軍無人總統慮賊勢北趨飭公飛催左宗棠各軍  
由池州廣德分路進兵規復蘇常並籌畫江北一帶防務公覆  
疏云李元度張運蘭鮑超等到徽當在七八月間左宗棠到徽  
當在九月中旬目下皖南危乎其危浙江亦防不勝防臣軍到  
齊以後須一攻廣德一攻甯郡勢不能繞越皖境而徑趨蘇常  
前准薛煥咨函松江上海等處水陸人數無多欲由張玉良處  
分撥三千人近因江西多事文報阻滯張玉良嘉興一軍與臣

虞信息罕通臣新膺督師江南之命本有統轄該軍之責惟現值皖南阨危不能舍近而圖遠都興阿迭奉

諭旨督辦揚州軍務官文胡林翼百計經營謀所以資送之法而三千勁旅五月口糧一時難以撥付以臣愚見淮徐風氣剛勁不患無可招之勇但患無訓練之人擬函商官文都興阿等酌帶楚師千人先行馳往到江北後用楚軍之營制練淮徐之勇丁嚴其禁約寬其期限若得一二名將出乎其間則兩淮之勁旅不減三楚之聲威

旨報可 侍郎龐鍾璐奏陳謀蘇方畧謂由浙至蘇必須先復吳江山滬至蘇必須先復崑山由江北至蘇必須先由常熟進

兵再由丹陽溧陽追躡其後庶可殲除賊匪請飭會國藩迅速  
統師南下

上以蘇常被匪蹂躪民國尙能殺賊若久在陷沒慮民心懈而  
賊守益堅飭公籌度何路進兵迅圖規復公疏言目下軍情自  
以規復蘇常爲要而出皖南進兵必以急援甯國急攻廣德爲  
要鮑超張運蘭李元度七月底均可到祁門臣擬俟該鎮道等  
到齊派鮑超由黟縣攻石埭張運蘭由太平攻涇縣李元度先  
往廣信布置防務仍由徽州旌德前進必俟涇旌石三路肅清  
直抵甯郡然後臣軍之立腳始定皖南之局勢始安皖南安則  
浙江亦安而蘇常亦有可圖若始皖南不安則臣軍岌岌自保



之不暇又何能屏蔽浙江更何能規復蘇常臣之棉力必俟八  
九月大戰數次然後視打仗之利鈍定入蘇之遲速目下兵力  
未齊上不能慰

聖主宵旰之憂下不能答蘇人雲霓之望寸心抱疚惶悚無地  
十四日江長貴收復廣德州 十六日賊陷金壇縣知縣李淮  
參將周天孚死之 二十三日賊陷嘉興大營張玉良退至石  
門賊復攻陷之 二十四日張運蘭軍抵祁門二十八日公檄  
張運蘭由徽州旌德赴援甯國 八月

詔罷張芾皖南督師周天受交公差委 時張玉良軍敗杭州  
戒嚴巡撫王有齡飛書告援公疏稱浙省賊勢浩大非三五千

人所能救全臣處別無大隊可撥必須左宗棠新軍抵徽配足萬人乃可赴杭援剿特駱秉章奉督辦四川軍務之

命奏請左宗棠入蜀是以左宗棠遲遲未能成行伏乞

敕令駱秉章暫緩入蜀俾左宗棠星夜兼程來皖共救浙而謀蘇或可補救萬一 初九日李元度軍抵祁門 賊陷廣德州

十二日賊陷甯國府前湖南提督周天受皖南道福咸等死之自甯國被圍公撥餉銀五千兩由張芾派弁資送道梗弗能通而賊酋陳玉成賴裕新古隆賢楊輔清等四面圍至初九日攻陷郡北竹塘營壘副將朱鳳山戰歿十一日陷城北廟埠營壘公聞警趣張運蘭速進時城內糧米早絕是日天受令城外

各營出六成隊擊賊互有殺傷未刻大雨如注賊乘勢撲陷各營天受知事無可爲屬各將弁帶兵自南門衝出自策馬送之文武員弁跪請天受出城徐圖再振天受不允誓以身殉黃昏時羣賊蠶入遂遇害皖南道福咸率衆巷戰死之同時殉難者甯國府知府顏培文宣城縣知縣王乃晉事聞均奉

旨優卹 十六日李元度軍抵徽州 二十日鮑超軍抵和門

二十五日賊陷徽州府初皖南道李元度甫接徽防僞侍王李世賢率悍黨四萬餘人直撲徽城更番誘戰元度親出督戰斃賊數百名伏賊自嶺後出抄我軍元度收軍入城賊跟踪圍攻見西門城垣坍塌無堞口乘陰雨黑夜急攻之元度身卧城

頭竭力堵禦昧爽賊退次日賊伏民房鑿牆對城施火鎗守陣  
弁兵不能立城遂陷元度巷戰突圍而出以圖再舉賊趨祁門  
甚急適左宗棠軍次南冒公檄赴樂平婺源之間以備截擊  
是時夷氛犯

關

鑒與出狩熱河公與胡林翼疏請帶兵入衛日夜籌商北援之  
策尋和議成

上諭皖南北均當與緊該大臣等一經北上難保逆匪不乘虛  
思竄擾及完善之區江西湖北均爲可慮曾國藩胡林翼均著  
無庸來京該大臣甫接皖南防務連失兩軍雖屬餉絀兵單究

屬籌畫未密著振作軍心再接再厲萬勿以一挫之後卽損軍威李元度謀勇兼優此次失軀殊屬可惜人材難得著卽迅速查明下落 是月李若珠患痺症不能軍

詔荊州將軍都興阿赴揚州督辦江北軍務 廣西官軍屢敗石達開於興安鬱林北流等處 九月初七日賊陷嚴州府遂陷道安縣 十五日左宗棠軍次樂平 二十九日鮑超張運蘭攻休甯大捷 十月初四日張運蘭敗賊於榔市斬僞將軍汪懷忠楊載福率水師援南陵救出難民十餘萬人 十五日鮑超張運蘭擊援賊於萬安街敗之 十七日李世賢遣賊解火藥赴休甯鮑超張運蘭邀擊敗之燬賊壘二座 十九日

忠王李秀成由羊棧嶺陷黟縣鮑超張運蘭攻克之 二十一日鮑超張運蘭敗賊於廬村斬偽丞相吳桂先賊大股退出羊棧嶺 二十二日左宗棠軍次景德鎮擊賊於貴溪敗之 多隆阿李續宜連敗賊於桐城 是月賊犯杭州省官軍擊卻之並收復餘杭縣張玉良克嚴州府遂克壽昌縣 石達開遣黨竄湖南連陷綏甯城步東安三縣我軍旋克復之 十一月初一日左宗棠克德興遂克婺源初宗棠擊賊貴溪賊由弋陽方家墩竄德興之黃柏塘宗棠遣楊昌濬王開化於太白司下河架浮橋渡河至楓樹鎮賊始覺分三路蜂擁而來楊昌濬王開化列隊山岡指揮策應賊驚潰我軍乘勝攻城賊開南門竄入

婺源冒濬等入城安撫難民初三日進攻婺源賊閉門死拒我軍奮力登陴賊奪東南門逃走我軍邀擊於浮橋賊紛紛墮水追殺二十餘里餘匪向開化竄去是爲左軍克城之始 公疏稱左宗棠一軍自移師景德駐紮未久一聞貴溪有警分路調撥或迎頭截擊或跟踪追剿十日之內轉戰三百餘里連克二城使狼奔豕突之衆喘息不得少定實屬調度神速將士用命左宗棠初立斯軍驟當大敵盡而躍馬入陣暮而治事達旦實屬勤勞異常惟係襄辦京堂大員應如何優擢獎敘之處出自聖裁

詔擢左宗棠三品京堂

賊陷東流縣

初四日賊陷建德縣

初九日賊陷彭澤縣 十二日賊陷浮梁縣 十三日賊陷  
都昌鄱陽兩縣 十五日賊陷潯口王夢齡營 十六日賊陷  
上溪口楊名聲營 十九日賊陷婺源縣 是時公弟國荃攻  
安慶僞英王陳玉成大舉赴援國荃擊走之玉成與官軍相持  
於桐城僞忠王李秀成僞侍王李世賢僞輔王楊七麻子萃於  
徽州遣黨分陷各城邑包抄祁門大營冀解安慶之圍而另以  
大支破羊棧嶺而入二十一日竄漳嶺祁門四面皆賊文報斷  
絕楊載福率水師連克東流彭澤都昌鄱陽四縣而賊之圍湖  
口者復經彭玉麟吳坤修水陸固守得無恙於是左宗棠克浮  
梁縣唐義訓克建德縣我軍聲勢復振其犯嶺之賊連被鮑超



張運蘭擊敗公營始安 是月趙景賢率民勇解湖州圍 十  
二月僞定南主將黃文金由景德退踞石門洋塘等處與左宗  
棠鮑超諸軍相持雨雪連綿未能接戰僞忠王李秀成圍撲玉  
山旋解圍去 是月賊由江西竄福建陷漳州府 張玉良克  
江山常山二縣